

仁王護國般若經疏卷第三

碑三

隋天台智者大師說  
門人灌頂記

觀空品第二

言觀空者謂無相妙慧照無相之境內外並

碑三

寂緣觀俱空故言空觀品也又凡夫不識外

道妄取二乘耽滯今菩薩以般若正智觀空

非空超凡越聖故言觀空也又凡夫著有二

乘著空菩薩捨有而復觀空也又觀是能觀

空是所觀能所俱空真佛知見故下文云見

境見智非聖見也此下六品名爲正說大分

爲四前之三品明內護護國一品明外護散

華品明報恩供養受持品明弘經相貌初文

更二初略開二護次問答廣釋初文四一知

請意二略正開三勸發三慧四歡喜供養今

初爾時佛告大衆者教所被機也十六大國  
王意欲問護國土因緣者生下外護經文與  
護國品爲本也吾今先爲下二正略開二護  
謂因果也護佛果因緣即生此品也護十地  
行因緣即生散華品十地行者謂護因也問  
王但請護國土因緣佛何故先爲說護佛因  
果耶答人情麤淺妙理難知王雖麤情唯請  
一而佛麤妙俱施又若但爲說護國國土安  
樂增長惰慢今佛說出世因果令其厭俗樂  
入真也又索少是弟子之禮賜多是爲師之  
法又索少表不貪施多表不慳又索少施多  
表慈導之志云諦聽諦聽下三勸發三慧諦  
聽今生聞慧善思念之今生思慧如法修行  
今生修慧云時波斯匿王下四歡喜供養王  
言善者信順之辭也大事因緣爲茲出世顯

令衆生開示悟入佛之知見法華以佛知見爲大事涅槃以佛性爲大事維摩思益以不思議爲大事華嚴以法界爲大事今此般若以成因果爲大事名字雖別其義一也故智論佛說般若無央數衆生當續佛種是爲

碑三

二

大事又大品云須菩提白佛言世尊般若爲

大事故起龍樹釋云能破衆生諸大煩惱能

與諸佛無上大法名爲大事散華表行因成

帳表得果蓋衆表慈悲度物墮育羣生

云爾

時大王復起作禮下第二問答廣釋文二先

問次答初文二先明修敬白佛言下二正發

問問中有二一問護果二問護因佛言菩薩

化四生下二佛答文大爲三初此品明自利

行答前問次教化品明利他行答第二問後

二諦品明二護所依就答初問文二初正釋

觀空後佛說法時下時衆得益初文二先正釋後總結釋中二初標宗正釋後問答重釋初文二一正釋二結行初又二一所化境二能化智初言四生者所化境也天及地獄是化生鬼有胎化二生育生則鳥及龍是四生人中亦四爾時人胎生毗舍佢子從三十二卯生大山小山比丘從鶴卯生菴羅波離姪女從濕生劫初人皆化生也云不觀色如下二明能化之智文三初約法二解釋三結成初約五法一五陰二衆生三佛果四菩薩五真妄五陰是所依衆生是能依佛是果菩薩是因五陰衆生是妄佛菩薩是真也今初五陰是有如是空若見色見如不免斷常如則是斷色則是常若觀色滅方如此三藏見若體色即如此通見若如即色此別見若知一

碑三

三

一切法性真實空無生滅同真際等法性無二  
無別此圓見今言不觀色如等是圓見也衆  
生我人如者五陰衆共生名衆生我者計內  
五陰爲假名人也常樂我淨如者前五陰衆  
生是顛倒法非常樂我淨今佛果得非顛倒  
法是常樂我淨隨盡煩惱有殊而性常無異  
其猶冰水故云如也知見壽者下明菩薩有  
三位二人三行位者十信名知十解十行  
名見向至地名壽者雖有三別而一如也菩  
薩如者二明人如六度下三明行如問淨名  
云一切衆生皆如也一切法亦如也衆聖賢  
亦如也至於彌勒亦如也與今何異答彼是  
真空此是妙有問真空妙有云何答動即寂  
真空也寂即動妙有也真空故非常妙有故  
非斷真空不住生死妙有不住涅槃妙有故

能起大悲真空故能生大慈問淨名云一切  
皆如此云不觀色如何耶答若偏觀一切皆  
如還是斷若不觀如還是常淨名云如今離  
常見此云不觀令離斷見二見既離中道自  
明矣云二諦如者明真妄也世諦是妄出世  
是真也是故一切法性下二解釋文三一釋  
二會通三舉況今初一切法性是真有真實  
空是真空真空故不來真有故不去不去則  
無滅不來則無生無滅無生孰凡孰聖既無  
聖凡誰論觀與不觀也同真際下二會通真  
際還是真空法性還是妙有一色一香悉皆  
如是故云同等也如虛空者三舉況空中豈  
有五陰衆生菩薩諸佛世諦真諦生滅去來  
者乎愚昧者不解故舉斯況云是故陰入界  
下三結成無我是結陰入界衆生等如無所

有相是結佛菩薩及知見壽者等如也是爲菩薩下第二結行金剛云一切賢聖皆以無爲法而有差別即同此文也云白佛言下第二問答重釋文二初明三般若教二明依教發觀今初三般若即爲三別初中明實相般

若先問後答上云不觀色如今問意者若云

是爲菩薩行化十地令諸法皆空者菩薩爲化何等衆生耶大王法性色下二答文二一明真則無化二明俗則有化初文四一境二觀三徵四釋今初五陰是地前菩薩境常樂我淨是地上菩薩境云不住色下二明觀有人言不住色者遮住色不住非色遮住空不住非色雙遮住空住有又不住色遮住色陰不住非色遮住四陰不住非非色雙遮住五陰又不住色遮住色法不住非色遮住心

法不住非非色遮住非色非心法又不住色不住有不住非色不住空不住非非色不住空空故淨名云空病亦空今解者具足應云不住色不住非色不住亦色亦非色不住非色非非色此中略第三句及四句非色兩字也以色即空故不住色以空即色故不住非色以色空無二而二故不住亦色亦非色以色空二而無二故不住非色非非色次例四陰非非住上言不住今言非不住只以不住爲住住無所住金剛亦云應無所住而生其心也何以故者三徵意云何故言住又言不住也非色如下四釋非色如故不可定言住色非非色如故不可定言住非色也世諦故下二明俗則有化文四初明二緣故見有衆生可化二結成上無衆生義三明邪正二見

俱是見四結成正見今初言世諦者諦有三種一色諦二心諦三空諦也三假者謂法假受假名假也此中三假非成實中所明以無三藏故也名見衆生者以世諦及三假故有衆生可化也一切生性實故者二結成上真諦無衆生義一切衆生即涅槃相不復更滅故云實也乃至諸佛下三明邪正二見俱是見三乘聲聞緣覺菩薩也七賢謂七方便也八聖謂四果四向也六十二見釋者不同且依大論於五陰上皆作四句於色陰云過去色神及世間常是事實餘妄語無常等三句亦然餘陰亦如是成二十現在有邊無邊等歷五陰上有二十死後如去不如去等亦有二十成六十是神與身一神與身異成六十二見云大王若以名名見下四結成正見若

碑三

知諸法但有假名名之爲見非同世人見一切法也云白佛言下第二明觀照般若文二先問後答問意云有法既非是大乘云何照此從上非非見一切法文而生此難也大王摩訶衍下二答文二先略後廣初答意云大乘見者見法非法以色等法空故也法若非法下二廣答釋文二初正廣釋二明能觀之智雙照空有初文二先明法空性空次歷法明空今初云法若非法是名法空也法性空者性本若不空不可令其得空以性本自空故諸法皆空也色受想行下二歷法明空文二先正明後釋成空義今初約六門明空大論云五陰空是果報空十二入空是受用空十八界空是性別空以所病不同說斯三種爲疑心數者說於五陰爲疑色者說十

二入爲疑色心等者說十八界六大名遍到空阿含云六王諍大地云我不能載水云能漂潤火云能燒照風云能生動空云能容受識云若無我者色則敗壞五雖大而識爲主故云四大圍空識居其中也四諦是境空因緣是義空云是法下二釋成空義文二初就識陰次例四蘊及諸法初文四一標宗二類釋三徵詰四釋通今初以色法中有五義故空即生即住即滅者諸小乘師或云生前住次滅後或云生住同時皆不免難何者若云生前住次滅後則生時無住以生前故若無住者云何有生以先無住住於此生生不得住則無生也若住前無生則亦無住以無因故若生前有住則生住同時若生滅已方有住者住非生有此計異之過也若生住同時則

因果一體生死同相此計一之失今云即生即住即滅者不同二說以諸法體念念遷流無有暫止亦是生時即住時滅時如疾炎過鋒奔緣經刃不已則來無暫住時故淨名云汝今即時亦生亦老亦滅也即有即空者色性自空非色壞故空也剎那剎那下二類釋明念念皆空同上五也剎那者極短時也何以故者三徵詰意云生滅相違云何言即生即住即滅等云九十剎那下四釋通以九十九剎那爲一大念一念中一剎那復有九百生滅是故生時即有住滅也又九十剎那爲一念一念中一剎那經九百生滅一念有九十剎那含有八萬一千生滅以生滅攝剎那剎那攝一念如是心法不可得此明心空以四大分諸根諸根不可得以四微分四大四

大不可得以麤微分四微四微不可得以極微分麤微麤微不可得推色至於極微窮心盡於生滅色盡心窮豁然無住無住之住不可名之強是爲空即護三藏佛果也若見色色空見心心空無得無住此護通佛果也若見色心二法而一而異廣大如法界究竟若虛空函蓋相稱此護別佛果也若見色心二法本來空寂不動不住不生不滅此護圓佛果也云乃至色下第二類釋四陰及諸法亦即生即滅即有即空也云以般若波羅蜜空故下第二明能觀之智雙照空有文二先明觀照次明得失初更二一照空二照有初則無相後是有相無相者非但無所照亦無能照照無所照也大品經中名爲真實般若有相則接別凡聖無量教門大品經中名相似

釋三

般若也照空文中更爲二別初明照相以般若智中無毫釐實法故照一切法空不見緣者十二因緣空不見諦者四諦法空乃至一切法空者六大法等空也云言不見者觀諸法空故言不見非謂不照名爲不見故經云

非見及見名一切真實法也云內空下二明空之分齊分齊有十二種大論有十八空論問云若少則應一空若多則應無量何乃十八龍樹答云若略則事不周廣則事繁難悟如服藥少則病不差多則更增疾今說空亦如是少說則不能破邪見多說則近滋廣此經隨時治病不多不少唯十二也內空者謂內六入無神我外空者外六塵無我所內外空者根塵合觀無我我所有爲空者色心和合生陰界入等皆無所有無爲空者虛空數

滅非數滅空也無始空者外道以冥初爲始  
破此見故名無始空性空者諸法本無惑者  
計有乃至執言如來性等決定是有爲破此  
見故言性空故經云眼空無我無我所何以  
故性自爾故乃至意亦如是又華嚴云觀眼  
無生無自性識空寂滅無所有也第一義空  
者本空世諦世諦不有此亦是空般若波羅  
蜜空者大經云大空者是般若空大論云十  
方俱空名大空也因空者六度等空果空者  
菩提涅槃空空空者大論云以諸空破內外  
等法復以此空破諸空是名空空又以空破  
有有者云空若執空爲是須以此空空破也  
但法集故有下二明照有文三初三假門明  
有如上說因集故有下二四諦門明有因集  
是生死因即集諦果集是生死果即苦諦十

行即道諦從十信心乃至十地各有十種行  
門也佛果是涅槃即滅諦也乃至六道一切  
有者三約六道二十五有等明有云善男子  
若有菩薩下第二明得失文二初明邪觀是  
失也二明正觀是得也今初若菩薩發心行  
學般若見有法有衆生我人知見者世間凡  
夫無異也於諸法而不動下二明正觀文二  
一明行二明位今初言不動者即色是空非  
析色也不到者大品云平等之法一切聖人  
所不能到須菩提白佛言乃可餘聖不到佛  
何故不到佛言乃至佛亦不到何以故佛即  
平等平等即佛佛與平等無二故不到也不  
滅者空即是色也無相者色空空色皆無相  
也無無相者無相亦無也下例諸法云是即  
初地下二明位文二初明正觀後示說處初

文三一位二名三用今初也言一念者謂從第十回向以般若慧一念之中即有初地是時具足八萬四千度也依賢劫經始從光耀度終至分布舍利度合有三百五十功德門一一各修六度即二千一百復將二千一百對十法謂四大六衰又對十善一一皆有二千一百即二萬一千又將二萬一千對四衆生多貪多瞋多癡三毒等分各有二萬一千合之即有八萬四千也云即載名下二就名明正觀有本云即能運名摩訶衍載運義同也約體則是般若約用即是大乘即滅爲金剛下三約用能滅煩惱如金剛破物謂第十地末後一念也能離散亂故名定此中一行具無量門也如光讚下二示說處也大王是經下第三讚文字般若文五一明多佛共說

碑三

十一

一五二四九九

二舉喻三格量四舉況五明信解相今初也釋論云一字曰字二字曰名二字不合不得爲名若合說者始得爲名四字等名句句下所詮名味於恒河下二舉喻百億須彌百億日月鐵圍大海等是一大千界如河中沙一沙是一世界滿中七寶以施衆生及得四果也此中有財法二施意但文似隱也云不如下三格量無漏之心起一念信勝前二施何況解一句者四舉況信但不謗解能利他則信淺解深此約鈍根說苦如法華云汝舍利弗尚於此經以信得入者此乃即信是解約利根說也句非句下五明信解相文三一明文空二明文義俱空三明人法俱空今初也句是有非句是無非非句是非有非無非有非前有句非無非前無句又句即文字也非

句即文字之性離也非非句非前文字及性離之見也云般若非句句非般若者二明文義俱空般若非句是義空句非般若是文空以即文非般若即般若非文離文無般若離般若無文中無般若般若中無文如是互求不可得故即自空也又文及般若自他共離求不可得故空也般若亦非菩薩下三明人法俱空文中亦合明人空但文略故也

自爲二別一約因位辯法空二約果位辯法空初文三今初標也般若是法菩薩是人般若中求菩薩不可得即是法空何以故者二徵也十地下三釋若約通教即三乘共行十地說始住終若約別教即菩薩十地明始住終也亦非薩婆若下第二約果辯法空梵云薩婆若此翻一切種智一切種智即佛果也

佛果亦空故云亦非薩婆若也摩訶衍是乘能乘人既空所乘之法亦空也云大王若菩薩下第二依教發觀文二初明邪觀二明正觀今初見境者見實相般若也見智者見觀照般若也見說見受見文字般若也如是執見是凡夫顛倒妄想非聖見也又見境謂見塵見智謂見識見說見受謂見人妄執宛然非聖見也見三界下第二明正觀也文二初約染淨因果以明空相二約無聽說以辯空相初文二初明生死空後辯佛果空前更二初正明生死空後釋空所由初文二一明正使空二明習氣空初文二一明分段生死後明變易生死初更三今初明果空也三界是器世間衆生是假名世間果報是五陰世間謂三界依正也六識起下二明業空以六識

取六塵起諸煩惱貪著五欲展轉無量蘊積  
含藏名之爲藏無自性故名之爲空云三界  
空下三明煩惱空三界之本二念癡心闇於  
前境名曰無明有此無明即生三界無明如  
地能生萬物故名本也三地九生下二明變

釋三

十三

易生死空有人言三地者一見地從十四向  
至三地二修地從四地至七地三究竟地從  
八地至十地此別接通意也九生滅者前三  
地中各有始終云九生滅也又變易生死  
三界中各有三種意生身三界名三地各有  
三種意生身生滅名九生滅也從初地至五  
地名三昧樂意生身六七二地名覺法自性  
意生身八地已上名無作行意生身此通別  
教意生也餘無明習者上明五住正使此第  
二明習氣空也金剛菩薩下二釋空所由由

此菩薩得理盡三昧故一種生死煩惱業等  
皆空所言惑者謂迷妄之心造生死業不達  
心源名之爲惑即是煩惱果者即正報果有  
生滅故得名空有果空者即三界依報空故  
又果空者謂變易生死空因空者謂三界業  
煩惱等空也理盡三昧者謂菩薩得此三昧  
達理盡源極無明本故名理盡三昧也云菩  
婆若下二明佛果空文三今初明智斷空薩  
婆若亦空者是智空滅果空者是斷空或前  
已空者是正因佛性空佛性本自空非推之  
使空故言或前已空也佛得三無爲下二明  
無爲空智緣滅者觀心佛正觀心滅於煩惱  
名智緣滅非智緣滅者謂正因佛性本自  
淨無煩惱垢不勞觀行而滅惑也虛空者無  
色現處是也薩婆若下三結果空也云善男

子下第二約無聽說以明空相也文中法喻

合可見聽說如虛空者大品云聽如幻人聽說如幻人說故無聽說淨名云夫法說者無說無示其聽法者無聞無得法同法性者淨名云法同法性入諸法故以此例諸故皆如

碑三

十四

也大王菩薩下第二總結先結能護體也護

般若下二結能護用云佛說下第二明時衆

得益文二先時次益法眼淨者謂初地已上見中法非小乘中法眼也性地者謂三乘共

行十地略九舉一也信地者即四不壞信十

信菩薩是也大空大行即別教初地圓教初住已上皆名大空大行也云問佛說般若何

故得益不同答法華經云一地所生一雨所潤根莖大小差別自殊如其種性各得生長今說般若亦復如是雖說一法得益自差也

### 菩薩教化品第三

初三品明內護中今當第二釋護十地行即是明利他答第二問也言教化品者菩薩以利物爲德教諸衆生離一切惡化諸衆生修一切善又佛將此法教化衆生得成菩薩故

云教化品又以此法化諸國王令識般若故

也云品文二一發問二佛答今初也文有二

意一標前品中護十地行菩薩即能護人也

次云何行可行等者正是問辭一問菩薩自

利行法二問利他行三問所化衆生之相云

碑三

十五

又初問自利依何修行故以五忍答之次問

利他依何位行故以十地行答之後問何相

衆生可化故以幻身見幻化衆生而教化之

又此經說通自他而就他說爲正故文多利

他行故譯者亦以教化標目佛言大王下二

佛答文二初答前二問次答第三問前文三  
初正答二問次以偈讚佛後如來述成初文  
更二一正答前問兼利他二正答後問兼自  
利前文更三初略答二廣答後總結略答復  
三初標數者準下結諸佛菩薩本所修行今

隨問而答故但云是菩薩法耳二伏忍下列  
名也地前三賢未得無漏未能證但能伏不  
能斷故爲伏忍智也以有智故能伏煩惱初  
地二地三地得無漏信名信忍四五六地趣  
向無生名順忍七八九地諸念不生名無生  
忍十二地得菩薩果名寂滅忍以初地得  
無漏信此別教意也七地得無生忍即別接  
通意也然此五忍諸經不同若依本業瓔珞  
云六性一習種性二性種性三道種性四聖  
種性五等覺性六妙覺性即是十住十行十

迴向十地等覺妙覺也亦名四十二賢聖

云

名爲諸佛下三總結也善男子下第二廣釋  
五忍即爲五別初伏忍中三賢不同即爲三  
別先釋十住文爲五別一明方便二明入位  
三顯力用四釋超過五成聖因今初言發想

信者十信之中未入十住不見道理但能想  
信想信若成即入十住言恒沙者發心者多  
也如大經云如菴羅樹花多果少如大魚母  
胎子雖無量成就者少此言衆生欲求寶渚  
至於中路咸悉退還也於三寶中下二明入  
拜三  
位於三寶田中生此十心也善順故信不退  
名進決斷名慧不動名定能捨名施防護名  
戒不失名護上求曰願至菩提名迴向是爲  
菩薩下三明力用以十住菩提作銅輪王王  
南西二方名少分化衆生也已超過二乘下

四釋超過此圓教大乘十信則與二乘齊十住則斷無明過二乘地也云言一切善者十信名善故下經云十善菩薩發大心長別三界苦輪海言超過二乘即聲聞緣覺一切善地即十信菩薩也一切諸佛下五成聖因十心是因諸佛菩薩是緣因緣和合故成聖胎也即以中道一心三觀爲種子斷一品無明即能見佛性故成聖胎也次第起乾慧下第二明十行有本云復次善男子今且依次第解也文四一明位二辯體三明化他四釋離患今初明位即三忍中第二忍也前下伏忍即是聞慧今中伏忍即是思慧言乾慧者無定水也故云是思慧耳經千字者非瓔珞中有六性亦名六慧言六性者即習種性種道種聖種等覺妙覺等也言六慧者謂聞思修

無相照寂寂照等也習已成性名種性有十心者總標其數也所謂四意止下二辯體文三今初明四念處意止者謂以智慧令心止住意即心王也身受心法者明所觀之境也苦無常等明能觀之體也觀身不淨能除淨倒觀受是苦能除樂倒觀心無常能滅常倒觀法無我能除我倒也三意止下二明三善根以慈故無瞋施故無貪慧故無癡也三意止下三明三世忍心緣過去無明及行名因忍現在五果及現在三因名因果忍未來兩果名爲果忍又於一切法皆有此三如種子但因如瓜瓠亦因亦果能作果等是因結實成種是果種等但果非因此約一時三世論也是菩薩亦能下三明化他也已能過下四明離患文中先明離內患即我人知見等也

及外道下次明離外患也復有十下第三明  
十迴向有本云復次善男子修行上伏忍進  
入平等道名爲道種性地文有四今初標位  
也謂欲入初地能與聖道爲因性故名道種  
性所謂觀色下二出體文三初明五忍中初  
列五陰是所觀法得戒下是能觀智由觀色  
陰便得戒忍以作無作戒皆色陰也準此經  
文作無作戒皆是色攝觀識陰故得知見忍  
以了別識與知見文類相似也觀想陰得定  
忍以從倒想能入於定如無色界天由想故  
成觀受陰得慧忍以依受故立四禪天由於  
禪故能發智慧觀行陰得解脫忍以行無常  
故得解脫忍問何故色下而說識答四陰皆  
心爲主由識分別於色由色故識方能行相  
生義便如此說云觀三界下二明三忍以觀

釋三

十八

三界苦果空故得空忍觀三界因空故得無  
願忍以煩惱業爲集諦故也觀三界因果空  
故得無相忍證因果空成無相觀也二諦虛  
實下三明二忍以觀俗諦是有爲法得無常  
忍觀真諦是無爲法故得無生忍無常忍即  
小乘藏教無生忍即大乘通教也出體竟是  
菩薩十堅心下三明攝化以道種性菩薩作  
金輪王化四天下也又十堅心者即結上五  
三二忍成十堅也生一切衆生善根者四明  
勝用也伏忍三品竟云

音釋

仁王護國般若經疏卷第三

分齊 分扶問切齊才詣 摈切 協胡故切  
切分齊限量也 摈切 狐匏也 切